

Qanoq iliornikkut Sarfaq Ittuup Ilulissat-niit kujammukarnermini inuit Kangaatsiaq-miut taakkulu eqqaamiui aqqusaarneqarsinnaalernissaat pillugu aaqqiisoqarsinnaanersoq apeqquteqaat aallaavigalugu oqallisissiaq
(Inatsisartuni ilaasortaq Villy Olsvig, Inuit Ataqatigiit)

Akissuteqaat

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoq)

Sarfaq Ittuup angalanissamut pilersaarutaata – pingaartumik Kangaatsiamut tunngatillugu – pitsanngortinneqarnissaa pillugu apeqquteqaat aallaavigalugu oqallinnissamut siunnersuummut saqqummiunneqartumut Naalackersuisuniit qujavugut. Angallannermi attaveqaatit qanoq ililluni innuttaasunut tamanut nuannaarutaasumik iluaqutaasumillu pitsaanerpaamik aaqqinneqarsinnaanerinut Kangaatsiarmiunuinnaanngitsoq, kisiannili aamma illoqarfinnut allanut ullumikkut aqqusaarneqarneq ajortunut, ingerlaavartumik misissuinissaq Naalackersuisut pingaartittorujussuaat.

Illoqarfiit akunnermini isorartunerujussuisa kingunerisaanik ornitassanit arlallit niuernikkut attassiffiusinnaanngillat annertuumik aningaasaliisoqanngippat. Taamaattorli Naalackersuisut innuttaasut angalanissamut periarfissaqarnissaat qulakkeerniarlugu sullissisunut assigiinngitsunut arlalinnik kiffartuussinissamik isumaqatigiissuteqarput. Soorlu Qeqertarsuup Tunuani Disko Line sullissinissamut isumaqatigiissuteqarfigineqarpoq, sapaatit akunneranut arlaleriarluni Kangaatsiamut akuttoqatigiinnik attaveqartarnissamut qulakkeeriffiusumik. Tamatuma saniatigut Arctic Umiaq Line-p umiarsuaa Sarfaq Ittuk Qeqertarsuup Tunuani illoqarfinnut arlalinnut tikittarpoq.

Sumiiffiit akornanni isorartussutsit annertunerat ilaasutigullu tunngavissat annertunerunnginnerata peqquutigalugu Arctic umiaq Line niuernermik tunngaveqarluni sullissisinnaanngilaq. Taamaattumik ingerlatseqatigiiffik siornatigut kitaata sineriaani angallassisinnaaniarluni amigartooruteqarnissamut qularnaveqqusiiffiqineqartarpoq. 2017-imi Arctic Umiaq Line aamma Namminersorlutik Oqartussat kiffartuussinissamut isumaqatigiissuteqarmata tamanna allanngortinneqarpoq. Kiffartuussinissamut isumaqatigiissuteqarnermi Sarfaq Ittuup 2016-imi angallassinermut pilersaarutini assigikannersinnaasaanik angallassiinnarnissaa qulakkeerneqarpoq. Tassunga tunngatillugu oqaatigineqassaaq, kiffartuussinissamut isumaqatigiissutip allanngortinneqarnissaa ilaneqarnissaaluunniit isumaqatiginninniutigineqarsinnaammat, tamannali immikkut ittumik aningaasalersorneqartussaavoq.

Soorunami isumalluutit, ilaasunik angallassinermut immikkoortinneqartut isumatusaarnerpaamik atorneqarnissaat pingaaruteqarpoq. Kisiannili tamatuma saniatigut aamma Arctic Umiaq Line ataasiinnarmik umiarsuaateqarpoq, sineriak tamakkerlugu sullissisussamik. Taamaattumik matumani aningaasaqarneq kisimi apeqqutaanngilaq, kisiannili aamma pisinnaasat apeqqutaallutik.

Siornatigut oqaatigineqareersutut Sarfaq Ittuup angalanissamut pilersaarutaani umiarsuakkut ornitassat tikittagai misissorneqarsinnaapput. Kisiannili Sarfaq Ittuk ornitassanut, ullumikkornit amerlanerusunut tikittassappat, tamanna ornitassani allani kiffartuussinerup ajornerulerneranik kinguneqarnissaa ilimagineqarsinnaavoq, ornitassat ilaannut tikittartut akulikissusii allangorsinnaammata imaluunniit ornitassat allat taamaatinneqarsinnaammata.

Taamaakkaluartoq Naalakkersuisut killissarititaasut isiginiarnissaannut taarsiullugu periarfissanik misissuinissaq piareersimaffigaat. Angallannermut attaveqaatit eqaannerulernissaannut ataqatigiinnerulernissaannullu periarfissat ilaattut angallannermi sullissisut assigiinngitsut angalanissaminnut pilersaarutiminnik ullumikkornit pitsaanagerusumik ataqatigiissaarinissamut qulakkeerisinnaapput. Taamaalilluni innuttaasut kiisalu takornariat angalanerminni pitsaanerpaanik misigisaqarsinnaalissapput.

Taamatut oqaaseqarlunga Naalakkersuisut sinnerlugit pitsaasumik pilersitsiviusumillu oqallinnissamik kissaateqarpunga.